

საქართველოს მთავრობის

დადგენილება №301

2017 წლის 22 ივნისი

ქ. თბილისი

სახელმწიფო ხაზინის განკარგულებაში არსებული ფულადი სახსრების განთავსების წესის დამტკიცების შესახებ

მუხლი 1

საქართველოს საბიუჯეტო კოდექსის 18⁴ მუხლის მე-10 ნაწილის საფუძველზე, დამტკიცდეს თანდართული სახელმწიფო ხაზინის განკარგულებაში არსებული ფულადი სახსრების განთავსების წესი.

მუხლი 2

„ნორმატიული აქტების შესახებ“ საქართველოს კანონის 25-ე მუხლის შესაბამისად, ძალადაკარგულად გამოცხადდეს „სახელმწიფო ხაზინის განკარგულებაში არსებული თავისუფალი ფულადი სახსრებით მოკლევადიანი სესხების გაცემის წესის დამტკიცების თაობაზე“ საქართველოს მთავრობის 2011 წლის 31 იანვრის №53 დადგენილება.

მუხლი 3

დადგენილება ამოქმედდეს გამოქვეყნებისთანავე.

პრემიერ-მინისტრი

გიორგი კვიციანი

სახელმწიფო ხაზინის განკარგულებაში არსებული ფულადი სახსრების განთავსების წესი

მუხლი 1. ზოგადი დებულებანი

1. ეს წესი განსაზღვრავს საქართველოს ფინანსთა სამინისტროს სახელმწიფო საქვეუწყებო დაწესებულებების – სახაზინო სამსახურის (შემდგომში – სახელმწიფო ხაზინა) განკარგულებაში არსებული ფულადი სახსრების განთავსების ფორმებსა და პირობებს.

2. სახელმწიფო ხაზინის განკარგულებაში არსებული ფულადი სახსრების განთავსება ხორციელდება დეპოზიტის ან/და უზრუნველყოფილი დეპოზიტის ფორმით, ეროვნული ვალუტით, ამ წესით განსაზღვრული პირობების დაცვით.

მუხლი 2. წესში გამოყენებული ტერმინები

ამ წესის მიზნებისათვის გამოყენებულ ტერმინებს აქვთ შემდეგი მნიშვნელობა:

ა) სახელმწიფო ხაზინა – სახელმწიფო საქვეუწყებო დაწესებულება – საქართველოს ფინანსთა სამინისტროს სახაზინო სამსახური;

ბ) სახელმწიფო ხაზინის განკარგულებაში არსებული ფულადი სახსრები – სახელმწიფო ხაზინის ანგარიშებზე არსებული ფულადი სახსრები;

გ) სახელმწიფო ხაზინის ანგარიშებზე არსებული ფულადი სახსრების განთავსება – სახელმწიფო ხაზინის ანგარიშებზე არსებული ფულადი სახსრების გადატანა კომერციულ ბანკ(ებ)ში დეპოზიტის ან/და უზრუნველყოფილი დეპოზიტის სახით;

დ) დეპოზიტი – სახელმწიფო ხაზინის არაუზრუნველყოფილი ვადიანი დეპოზიტი ან/და არაუზრუნველყოფილი მოთხოვნადე დეპოზიტი;



ე) ვადიანი დეპოზიტი – კომერციულ ბანკში სადეპოზიტო ანგარიშზე წინასწარ განსაზღვრული ვადით განთავსებული სახელმწიფო ხაზინის ფულადი სახსრები, რომელსაც ამ წესით განსაზღვრული პირობების შესაბამისად კომერციული ბანკის მიერ ერიცხება პროცენტი;

ვ) მოთხოვნამდე დეპოზიტი – კომერციულ ბანკში სადეპოზიტო ანგარიშზე განთავსებული სახელმწიფო ხაზინის ფულადი სახსრები, რომელსაც ამ წესით განსაზღვრული პირობების შესაბამისად კომერციული ბანკის მიერ ერიცხება პროცენტი და რომლიდანაც თანხის გამოთხოვა შესაძლებელია მოთხოვნისთანავე;

ზ) უზრუნველყოფილი დეპოზიტი – უზრუნველყოფილი ვადიანი დეპოზიტი და უზრუნველყოფილი მოთხოვნამდე დეპოზიტი;

თ) უზრუნველყოფილი ვადიანი დეპოზიტი – ვადიანი დეპოზიტი, რომელიც უზრუნველყოფილია ამ წესის შესაბამისად, ფასიანი ქაღალდებით;

ი) უზრუნველყოფილი მოთხოვნამდე დეპოზიტი – მოთხოვნამდე დეპოზიტი, რომელიც უზრუნველყოფილია ამ წესის შესაბამისად, ფასიანი ქაღალდებით;

კ) კომერციული ბანკი – „კომერციული ბანკების საქმიანობის შესახებ“ საქართველოს კანონით განსაზღვრული კომერციული ბანკი;

ლ) მრავალი ფასის მეთოდი – აუქციონის ჩატარების მეთოდი, რომლის დროსაც აუქციონში გამარჯვებული თითოეული კომერციული ბანკის თითოეული განაცხადი კმაყოფილდება განაცხადში მითითებული ფასით;

მ) ელექტრონული სავაჭრო სისტემა – პროგრამული უზრუნველყოფა, რომლის საშუალებითაც ხორციელდება;

მ.ა) სახელმწიფო ხაზინის ანგარიშებზე არსებული ფულადი სახსრების განთავსება დეპოზიტის ან/და უზრუნველყოფილი დეპოზიტის ფორმით;

მ.ბ) სახელმწიფო ფასიანი ქაღალდების აუქციონზე რეალიზაცია, ამ წესის მე-7 მუხლის შესაბამისად;

ნ) ფასიანი ქაღალდების აუქციონის განაკვეთის დონე – სახელმწიფო ხაზინის მიერ განსაზღვრული მაქსიმალური საპროცენტო განაკვეთი, რომლის ზემოთაც აუქციონში მონაწილე განაცხადები არ დაკმაყოფილდება.

მუხლი 3. სახელმწიფო ხაზინის ანგარიშებზე არსებული ფულადი სახსრების განთავსების ორგანიზება და ძირითადი პირობები

1. სახელმწიფო ხაზინის ანგარიშებზე არსებული ფულადი სახსრების კომერციულ ბანკში განთავსება ხორციელდება ეროვნული ვალუტით.

2. სახელმწიფო ხაზინის მიერ კომერციულ ბანკებში ფულადი სახსრების განთავსება ხდება დეპოზიტის ან/და უზრუნველყოფილი დეპოზიტის ფორმით, აუქციონის წესით.

3. აუქციონი ტარდება სახელმწიფო ხაზინაში ელექტრონული სავაჭრო სისტემის გამოყენებით, მრავალი ფასის მეთოდით.

4. აუქციონში მონაწილეობის მიღება შეუძლიათ კომერციულ ბანკებს.

5. სახელმწიფო ხაზინა აუქციონის ჩატარების თარიღამდე არაუგვიანეს წინა დღისა კომერციულ ბანკებს უგზავნის ელექტრონულ შეტყობინებას აუქციონის გამოცხადების შესახებ, ამავე მუხლის მე-7 და მე-8 პუნქტების შესაბამისად.

6. სახელმწიფო ხაზინას უფლება აქვს, მიზეზის მითითების გარეშე გააუქმოს გამოცხადებული აუქციონი ან ცვლილება შეიტანოს მის პირობებში, რის შესახებაც აუქციონის დაწყებამდე არანაკლებ 1



საათით ადრე სახელმწიფო ხაზინა აცნობებს კომერციულ ბანკებს იმავე საშუალებით, რითაც მოხდა აუქციონის გამოცხადების შესახებ შეტყობინების გაგზავნა.

7. დეპოზიტის შემთხვევაში, აუქციონის გამოცხადების შესახებ სახელმწიფო ხაზინის შეტყობინება მოიცავს:

- ა) აუქციონის ჩატარების თარიღსა და დროს;
- ბ) აუქციონზე გამოტანილი დეპოზიტის თანხის საერთო მოცულობას;
- გ) დეპოზიტის მინიმალურ წლიურ საპროცენტო განაკვეთს;
- დ) დეპოზიტის განთავსებისა და დაფარვის თარიღებს;
- ე) დეპოზიტზე პროცენტის გადახდის პერიოდულობას;
- ვ) კომერციული ბანკის განაცხადის წარდგენის დროსა და საშუალებას.

8. უზრუნველყოფილი დეპოზიტის შემთხვევაში აუქციონის გამოცხადების შესახებ სახელმწიფო ხაზინის შეტყობინება მოიცავს:

- ა) აუქციონის ჩატარების თარიღსა და დროს;
- ბ) აუქციონზე გამოტანილი უზრუნველყოფილი დეპოზიტის თანხის საერთო მოცულობას;
- გ) უზრუნველყოფილი დეპოზიტის მინიმალურ წლიურ საპროცენტო განაკვეთს;
- დ) უზრუნველყოფილი დეპოზიტის განთავსებისა და დაფარვის თარიღებს;
- ე) უზრუნველყოფილ დეპოზიტზე პროცენტის გადახდის პერიოდულობას;
- ვ) კომერციული ბანკის განაცხადის წარდგენის დროსა და საშუალებას;

ზ) უზრუნველყოფილი დეპოზიტისა და მასზე დარიცხული პროცენტის თანაფარდობას დეპოზიტის უზრუნველყოფისთვის გამოყენებული აქტივების ნომინალურ ღირებულებასთან.

9. სახელმწიფო ხაზინის დეპოზიტისა და უზრუნველყოფილი დეპოზიტის მინიმალური წლიური საპროცენტო განაკვეთი არ უნდა იყოს აუქციონის ჩატარების დღისთვის საქართველოს ეროვნული ბანკის მიერ დადგენილ მონეტარული პოლიტიკის განაკვეთზე ნაკლები.

10. კომერციული ბანკები აუქციონის დღეს განაცხადის მიღებისათვის დადგენილ დროს წარადგენენ ელექტრონულ განაცხადს, ელექტრონული სავაჭრო სისტემის მეშვეობით.

11. აუქციონში მონაწილეობის მისაღებად დეპოზიტის შემთხვევაში კომერციული ბანკის განაცხადში მითითებული უნდა იყოს შემდეგი რეკვიზიტები:

- ა) მოთხოვნილი დეპოზიტის თანხა;
- ბ) წლიური საპროცენტო განაკვეთი.

12. აუქციონში მონაწილეობის მისაღებად უზრუნველყოფილი დეპოზიტის შემთხვევაში კომერციული ბანკის განაცხადში მითითებული უნდა იყოს შემდეგი რეკვიზიტები:

- ა) მოთხოვნილი უზრუნველყოფილი დეპოზიტის თანხა;
- ბ) წლიური საპროცენტო განაკვეთი.



მუხლი 4. აუქციონის გამოცხადება და ჩატარების წესი

1. აუქციონის გამოცხადება ხორციელდება ამ წესით განსაზღვრული პირობების დაცვით.
2. აუქციონი ჩატარდება წინასწარ განსაზღვრული დროის განმავლობაში.
3. კომერციული ბანკების მიერ ელექტრონული განცხადებების წარდგენა ხდება ამ წესის მე-3 მუხლის მე-11 და მე-12 პუნქტების შესაბამისად.
4. აუქციონში თითოეული კომერციული ბანკის მიერ წარსადგენი განაცხადების რაოდენობა შეზღუდული არ არის.
5. სახელმწიფო ხაზინა არ განიხილავს/მიიღებს ისეთ განაცხადს, რომელიც დადგენილ დროზე გვიან არის წარდგენილი ან არ შეიცავს ყველა აუქციონზე ინფორმაციას ან შეიცავს არაზუსტ ინფორმაციას ან მონაცემებს, რომელიც შეუსაბამოა გამოცხადებულ პარამეტრებთან. აღნიშნული ინფორმაციისა და მონაცემების სისწორეზე პასუხისმგებელია მხოლოდ კომერციული ბანკი.
6. თუ აუქციონზე შესული განაცხადების მოცულობა აღემატება განთავსების გამოცხადებულ მოცულობას, პირველ რიგში დაკმაყოფილება ყველაზე მაღალი საპროცენტო განაკვეთის მქონე განაცხადი, ხოლო შემდგომ ყოველი მომდევნო განაკვეთის მქონე განაცხადი, სანამ დაკმაყოფილებული განაცხადების საერთო თანხა გაუთანაბრდება განსათავსებელ მოცულობას.
7. იმ შემთხვევაში, თუ აუქციონის დასრულებისას ერთი და იგივე საპროცენტო განაკვეთის მქონე რამდენიმე განაცხადის თანხა აღემატება ჯერ კიდევ გაუნაწილებელი განსათავსებელი თანხის მოცულობას, ეს განაცხადები დაკმაყოფილება პროპორციული განაწილების პრინციპით.
8. თუ აუქციონზე შესული განაცხადების მოცულობა ნაკლებია გამოცხადებული განთავსების მოცულობაზე, შესული განაცხადები სრულად კმაყოფილდება.
9. სახელმწიფო ხაზინა ვალდებულია, აუქციონის დასრულებიდან 1 საათის განმავლობაში, ელექტრონული სავაჭრო სისტემის მეშვეობით, აუქციონში მონაწილე კომერციულ ბანკებს მიაწოდოს აუქციონში მათი მონაწილეობის შედეგების ამსახველი ინფორმაცია.
10. აუქციონის შედეგები ქვეყნდება საქართველოს ფინანსთა სამინისტროსა და სახელმწიფო ხაზინის ოფიციალურ ვებგვერდებზე არა უგვიანეს აუქციონის ჩატარების დღისა.

მუხლი 5. ფულადი სახსრების მართვა დეპოზიტის შემთხვევაში

1. კომერციული ბანკის მიერ აუქციონზე მოთხოვნილი დეპოზიტის მოცულობა შესაბამისობაში უნდა იყოს თითოეულ კომერციულ ბანკში განსათავსებელი დეპოზიტის თანხის დასაშვებ მაქსიმალურ მოცულობასთან, მიმდინარე აუქციონამდე შესაბამის კომერციულ ბანკში განთავსებული დეპოზიტ(ებ)ის გათვალისწინებით.
2. თითოეულ კომერციულ ბანკში განსათავსებელი დეპოზიტის თანხის დასაშვები მაქსიმალური ჯამური მოცულობა განისაზღვრება აუქციონის ჩატარების დღისათვის კომერციული ბანკის საკუთარი კაპიტალის 7%-ის ოდენობით, „კომერციული ბანკების მიერ პილარ 3-ის ფარგლებში ინფორმაციის გამჟღავნების წესის დამტკიცების თაობაზე“ საქართველოს ეროვნული ბანკის პრეზიდენტის 2017 წლის 22 ივნისის №92/04 ბრძანების შესაბამისად გამოქვეყნებული უახლესი კვარტალური ფინანსური ანგარიშგების მიხედვით.
3. სახელმწიფო ხაზინის ანგარიშებზე არსებული ფულადი სახსრების დეპოზიტზე განთავსება ხდება აუქციონზე დაკმაყოფილებული განაცხადების შესაბამისად.
4. სახელმწიფო ხაზინა ახდენს ფულადი სახსრების გადატანას დაკმაყოფილებული განაცხადის წარმდგენ კომერციულ ბანკებში აუქციონის პირობებში მითითებულ დეპოზიტის განთავსების



თარიღში.

5. დეპოზიტის ვადის გასვლის დღეს კომერციული ბანკი ვალდებულია, ხაზინის ერთიან ანგარიშზე ჩარიცხოს დეპოზიტის ძირითადი თანხა და დარიცხული პროცენტი, გარდა იმ შემთხვევისა, თუ დარიცხული პროცენტის გადახდის პერიოდულობა სხვაგვარად არ განისაზღვრა.

6. დეპოზიტის დაფარვის ვალდებულების სრულად შეუსრულებლობის შემთხვევაში, კომერციულ ბანკს სახელმწიფო ხაზინის სასარგებლოდ დაერიცხება პირგასამტეხლო შეუსრულებელ ვალდებულებაზე ყოველ ვადაგადაცილებულ დღეზე საქართველოს ეროვნული ბანკის მიერ ერთდღიანი სესხისათვის დადგენილი პროცენტის ოდენობით.

საქართველოს მთავრობის 2018 წლის 4 მაისის დადგენილება №201 - ვებგვერდი, 07.05.2018წ.

საქართველოს მთავრობის 2026 წლის 30 იანვრის დადგენილება №37 - ვებგვერდი, 03.02.2026წ.

მუხლი 6. ფულადი სახსრებისა და უზრუნველყოფის საშუალებების მართვა უზრუნველყოფილი დეპოზიტის შემთხვევაში

1. კომერციული ბანკის მიერ მოთხოვნილი უზრუნველყოფილი დეპოზიტის მოცულობა შესაბამისობაში უნდა იყოს სახელმწიფო ხაზინის მიერ დადგენილ, დეპოზიტის მოცულობისა და დეპოზიტის უზრუნველყოფად გამოყენებული აქტივების ნომინალური ღირებულების თანაფარდობასთან.

2. უზრუნველყოფილი დეპოზიტის უზრუნველყოფად შესაძლებელია გამოყენებულ იქნეს:

ა) საქართველოს მთავრობისა და საქართველოს ეროვნული ბანკის მიერ გამოშვებული ლარით დენომინირებული სასესხო ფასიანი ქაღალდები:

ა.ა) საქართველოს მთავრობის სახაზინო ვალდებულებები;

ა.ბ) საქართველოს მთავრობის სახაზინო ობლიგაციები;

ა.გ) საქართველოს მთავრობის სახელმწიფო ობლიგაციები;

ა.დ) საქართველოს ეროვნული ბანკის სადეპოზიტო სერტიფიკატები;

ბ) საერთაშორისო საფინანსო ინსტიტუტების მიერ გამოშვებული ლარით დენომინირებული სასესხო ფასიანი ქაღალდები.

3. უზრუნველყოფილი დეპოზიტის უზრუნველყოფად გამოყენებული ფასიანი ქაღალდების დაფარვის ვადა არანაკლებ 5 საბანკო დღით უნდა აღემატებოდეს უზრუნველყოფილი დეპოზიტის ვადას და არ უნდა იყოს გამოყენებული სხვა ვალდებულებების უზრუნველყოფად.

4. უზრუნველყოფილი დეპოზიტისთვის ფასიანი ქაღალდების უზრუნველყოფის საშუალებად გამოყენება ხდება საქართველოს ფასიანი ქაღალდების ანგარიშსწორების სისტემაში (GSSS), ანგარიშსწორების დღეს, ხოლო უზრუნველყოფის საშუალებად მისი მოქმედების ვადა არანაკლებ 2 საბანკო დღით უნდა აღემატებოდეს უზრუნველყოფილი დეპოზიტის ვადას.

5. (ამოღებულია - 30.01.2026, №37).

6. სახელმწიფო ხაზინის ანგარიშებზე არსებული ფულადი სახსრების უზრუნველყოფილ დეპოზიტზე განთავსება ხდება აუქციონზე დაკმაყოფილებული განაცხადების შესაბამისად.

7. სახელმწიფო ხაზინა ახდენს ფულადი სახსრების გადატანას დაკმაყოფილებული განაცხადის წარმდგენ კომერციულ ბანკებში აუქციონის პირობებში მითითებულ უზრუნველყოფილი დეპოზიტის განთავსების თარიღში, ფასიანი ქაღალდების უზრუნველყოფის საშუალებად გამოყენების შემდეგ.

8. უზრუნველყოფილი დეპოზიტის ვადის გასვლის დღეს კომერციული ბანკი ვალდებულია, ხაზინის ერთიან ანგარიშზე ჩარიცხოს უზრუნველყოფილი დეპოზიტის ძირითადი თანხა და დარიცხული



პროცენტი, ხოლო სახელმწიფო ხაზინა გამოათავისუფლებს უზრუნველყოფის სახით მიღებულ ფასიან ქაღალდებს.

9. (ამოღებულია - 30.01.2026, №37).

10. (ამოღებულია - 30.01.2026, №37).

11. უზრუნველყოფილი დეპოზიტის ვადის გასვლის დღეს ვალდებულების სრულად შეუსრულებლობის შემთხვევაში, კომერციულ ბანკს სახელმწიფო ხაზინის სასარგებლოდ დაერიცხება პირგასამტეხლო შეუსრულებელ ვალდებულებაზე ყოველ ვადაგადაცილებულ დღეზე საქართველოს ეროვნული ბანკის მიერ ერთდღიანი სესხისათვის დადგენილი პროცენტის ოდენობით.

12. უზრუნველყოფილი დეპოზიტის ვადის გასვლის დღეს ვალდებულების სრულად შეუსრულებლობის შემთხვევაში, სახელმწიფო ხაზინა უფლებამოსილია, განახორციელოს უზრუნველყოფის საშუალების საკუთრებაში მიღება და რეალიზაცია ამ წესის მე-7 მუხლის შესაბამისად. უზრუნველყოფის საშუალების სახელმწიფო ხაზინის მიერ საკუთრებაში მიღების დღიდან შეწყდება დავალიანებაზე პროცენტის დარიცხვა.

საქართველოს მთავრობის 2026 წლის 30 იანვრის დადგენილება №37 - ვებგვერდი, 03.02.2026წ.

მუხლი 7. ფასიანი ქაღალდების საკუთრებაში მიღება და რეალიზაცია

1. კომერციული ბანკის მიერ ხაზინისათვის უზრუნველყოფილი დეპოზიტის დაუფარაობის შემთხვევაში, ფასიანი ქაღალდების რეალიზაციას სახელმწიფო ხაზინა ახორციელებს აუქციონის მეშვეობით.

2. ფასიანი ქაღალდების აუქციონში მონაწილეობის უფლება აქვთ კომერციულ ბანკებს.

3. თუ სახელმწიფო ხაზინის მიერ საკუთრებაში მიღებულია სხვადასხვა სახის ფასიანი ქაღალდი, აუქციონი შეიძლება ჩატარდეს ცალ-ცალკე ლოტებად სხვადასხვა სახისა და ვადის ფასიანი ქაღალდების მიხედვით.

4. ფასიანი ქაღალდების აუქციონის შესახებ შეტყობინებას სახელმწიფო ხაზინა კომერციულ ბანკებს უგზავნის ფასიანი ქაღალდების რეალიზაციის თაობაზე გადაწყვეტილების მიღების დღეს.

5. ფასიანი ქაღალდების აუქციონის შეტყობინება მოიცავს:

ა) ფასიანი ქაღალდის სახესა და რეგისტრაციის ნომერს;

ბ) ფასიანი ქაღალდის რაოდენობასა და ნომინალურ ღირებულებას;

გ) ფასიანი ქაღალდის დაფარვამდე დარჩენილი დღეების რაოდენობას;

დ) აუქციონის ჩატარებისა და განაცხადების წარდგენის თარიღსა და დროს;

ე) აუქციონის ჩატარების საშუალებას;

ვ) ანგარიშსწორების ვადებს;

ზ) სახელმწიფო ხაზინის შეხედულებისამებრ, მაქსიმალურ საპროცენტო განაკვეთს.

6. აუქციონში თითოეული კომერციული ბანკის მიერ წარსადგენი განაცხადების რაოდენობა შეზღუდული არ არის.

7. კომერციული ბანკი აუქციონის განაცხადში უთითებს:

ა) შესასყიდი ფასიანი ქაღალდების რაოდენობას;



ბ) საპროცენტო განაკვეთს.

8. იმ შემთხვევაში, თუ აუქციონზე არ იქნა წარდგენილი განაცხადები, არა უგვიანეს შემდეგი საბანკო დღისა სახელმწიფო ხაზინა აცხადებს ახალ აუქციონს ამ მუხლით განსაზღვრული წესის დაცვით.

9. ფასიანი ქაღალდების აუქციონის დასრულებიდან 1 საათის განმავლობაში სახელმწიფო ხაზინა უფლებამოსილია, დაადგინოს ფასიანი ქაღალდების აუქციონის განაკვეთის დონე.

10. თუ კომერციული ბანკი ვერ უზრუნველყოფს აუქციონზე დადებული გარიგების მიხედვით ანგარიშსწორებას დადგენილ ვადებში, მისი ყველა განაცხადი უქმდება. კომერციულ ბანკს სახელმწიფო ხაზინის სასარგებლოდ ეკისრება პირგასამტეხლო აუქციონზე დადებული გარიგების 5%-ის ოდენობით.

11. აუქციონის მეშვეობით გაყიდული ფასიანი ქაღალდების რეალიზაციით მიღებული თანხები მიმართული იქნება კომერციული ბანკის დავალიანების დასაფარად.

12. დეპოზიტის უზრუნველყოფის საშუალების რეალიზაციის თანხიდან სახელმწიფო ხაზინის მიმართ დავალიანების სრულად დაფარვის შემდეგ დარჩენილი ნამეტი თანხა, ასეთის არსებობის შემთხვევაში, უბრუნდება კომერციულ ბანკს.

მუხლი 8. ვადიანი დეპოზიტიდან და უზრუნველყოფილი ვადიანი დეპოზიტიდან თანხის გამოთხოვა ვადაზე ადრე

1. საჭიროების შემთხვევაში, სახელმწიფო ხაზინას განმარტების გარეშე აქვს უფლება, მოსთხოვოს კომერციულ ბანკს ვადიანი დეპოზიტის ან/და უზრუნველყოფილი ვადიანი დეპოზიტის თანხის დაბრუნება ვადამდე.

2. კომერციული ბანკი ვალდებულია მოთხოვნის მიღებიდან არაუგვიანეს შემდეგი სამუშაო დღის განმავლობაში, უზრუნველყოს შესაბამისი თანხის ჩარიცხვა ხაზინის ერთიან ანგარიშზე, რომლის შეუსრულებლობის შემთხვევაშიც გამოიყენება ამ წესით დადგენილი პირობები.

3. ვადიანი დეპოზიტის ან/და უზრუნველყოფილი ვადიანი დეპოზიტის ვადაზე ადრე გამოთხოვის შემთხვევაში, საპროცენტო სარგებლის სახით, კომერციული ბანკი უხდის სახელმწიფო ხაზინას გამოთხოვილ თანხაზე შესაბამის პერიოდში დარიცხული/დასარიცხი საპროცენტო სარგებლის ნახევარს.

4. უზრუნველყოფილი ვადიანი დეპოზიტის ვადაზე ადრე გამოთხოვის შემთხვევაში, უზრუნველყოფის საშუალებად გამოყენებულ ფასიან ქაღალდებს სახელმწიფო ხაზინა გამოათავისუფლებს კომერციული ბანკის მიერ ხაზინის ერთიან ანგარიშზე სრული თანხის ჩარიცხვის დღეს.

5. (ამოღებულია - 30.01.2026, №37).

საქართველოს მთავრობის 2026 წლის 30 იანვრის დადგენილება №37 - ვებგვერდი, 03.02.2026წ.

მუხლი 9. აკრძალული ქმედებები და კომერციული ბანკების ვალდებულებები

1. სახელმწიფო ხაზინის მიერ ორგანიზებულ აუქციონებში მონაწილეობისას და ამ მონაწილეობასთან დაკავშირებით, კომერციულ ბანკებს ეკრძალებათ შემდეგი ქმედებების განხორციელება:

ა) ერთმანეთთან წინასწარ შეთანხმდნენ კონკრეტული აუქციონისთვის საკუთარი განაცხადების თაობაზე;

ბ) აუქციონის დამთავრებამდე ერთმანეთს აცნობონ ინფორმაცია საკუთარი განაცხადების შესახებ;

გ) კონკურენტი კომერციული ბანკების ინსაიდერული ინფორმაციის ან მათგან მიღებული სხვა



ინფორმაციის გამოყენებით განახორციელონ ისეთი ქმედებები, რომელიც აუქციონზე მათ ჩააყენებს დაუმსახურებელ უპირატეს/დომინანტ მდგომარეობაში სხვა მონაწილეებთან და/ან მესამე პირებთან შედარებით;

დ) აუქციონზე გააკეთონ განაცხადები ერთმანეთის ნაცვლად და/ან ერთმანეთის სასარგებლოდ.

2. სახელმწიფო ხაზინის მიერ ამ მუხლით გათვალისწინებული ქმედებების განხორციელების შესახებ შეტყობის ან/და საფუძვლიანი ეჭვის არსებობის შემთხვევაში, მას უფლება აქვს, კომერციული ბანკი გარკვეული დროით აღარ დაუშვას ამ წესით განსაზღვრულ სახელმწიფო ხაზინის მიერ ორგანიზებულ აუქციონ(ებ)ზე.

